




KOTAVUSA VIRDA

KOTAVAFA VIRDA VESTASA VA TAMAVA IS ARAYEEM MU AYIKEEM

Kotava, tela tamefa golerava
Va ina kosmac !!

Anyusteaksat ke 2023
10^e otuk





Noravank, armenafe tucpastaxe

Noravank (armenavon Նորավանկ, Warzafe tucpastaxe), tir armenafe tucpastaxe tigise koe Areni dota ke Vayots Dzor winka vagee Xayastana.

Noravank moe debak ke uja ke IX-X^{-eafa} decemda zo kolnayar. Kotak bak XII^{-eafa} decemda zo malvegeduyur voxen dalafa rekola tir ke XIII-XIV^{-eafa} decemda. In vanpiyir slape ke Orbelian jiomikeem. Tiyr runkaf is sposaf kali XIX^{-eafa} decemda, tulon icde sutexo. Bat zolonaf armenaf alkaf is arayaf debak tiyr tano sokexo ke tujradikeem ke Syunik.

Surp Karapet dalafa uja ke tucpastaxo tir dem vabduefe gavit gijaxe is do pokeon Surp Grigor uja. Surp Astvatsatsin uja dere tigr, isen rawaks ke abica gedrafa kolna is konak xatckar atcom is migexa ke XVII^{-eafa} decemda isu XVIII^{-eafa}.

Noravank bak XX^{-eafa} decemda tolun zo ikavegeduyur, ise re tir tana balemoya gijotafa koyutarulafa jekura ke Xayastana. Tucpastaxe is Amaghu ticekrantoza tid ke tutsokana vexala ke Gadakiewega ke UNESCO.


Tawavopafa debala

Noravank koe vwepafa krantoza ke Amaghu kuksa, i ke kovoama ke Arpa kuksa varone xayastanafa azekexa koe Pinafa Kavkaza. Debak moe raporafa azekontama arte 8 km-runu ecor moe ontine vas 1550 m- tigr, kabdue varkukafa is lukoptafa kalkafa kiria.

Izva

Krantoza ke Noravank mali Lekeraporugal zo kereler, koe debak ke Magil arulapa is yonara dilafa arula isu betsa.

Sedme Stepanos Orbelian armenaf tujradik is izvopik ke XIII^{-eafa} decemda, tucpastaxe bak 1105 gan Hovhannes tujradik ke Vahanavank nuve zo zabduyur. Surp Karapet warzafa uja co zo kolnayar.



Geltron vegedusa evla ke batmila uja re rawafa co tir ke IX-X^{-eafa} decemda. Soe Hovhannes va tucpastaxe co dimvegeduyur ise va tucpastikaf tum lizukon co inkeyer. Soe tucpastaxe bal Zakarian sare is Orbelian jiomafa yasa remi XIII-XIV^{-eafa} decemda oxam vonewer. Sersik ke bat prostelay tid jafasik va ref kolneem ke tucpastaxo lize sinafe slape dere tigr. Nekev kida nekiyina gan taneaf ruftacek bak 1340, tucpastaxe vanpir zolonafo alkaxo isu arayaxo tigiso poke Gladzor tucpastaxe is sokexo ke tujradikeem ke Syunik. Inafo sutexo tir dalafo xo ke Syunik serna ta warzera va armenafa pinoba bak XIV^{-eafa} decemda, kan tulon Momik.

Alkafa tigira kali XIX^{-eafa} decemda kotonon jijar, dem tulon vevedura va migexa bak XVII-XVIII^{-eafa} decemda vieli toloy ruftacek bak 1840 va tucpastaxe voyapar, az bareaf bak 1931.

Taneafa dimvegedusa kobavera bal sovietafe sare bak 1948-1949 zo sopud ; toleafa bak 1982 zo bokar aze arti san-perda bak 1999 zo tenuker viele Noravank tucpastaxe mu saneg gin zo fenkur. Bata nesida va sfelt ke Surp Astvatsatsin uja dere dimvegedur.

Noravank tucpastaxe is Amaghu ticekrantoza tir aotcaf debak bendeyen bak 1996 dene tutsokana vexala ke Tamavafa gadakiewega ke UNESCO. Noravank re tir tan aluboy dalaf koyutas debak ke patecta, do Garni is Zvartnots is Khor Virap.

Kolna

Tucpastaxo vas Surp Karapet uja is inafe gavit gijaxe, is Surp Grigor is Surp Astvatsatsin ruldar. Rawaks ke konaka kolna dere tigid : tulon lana gida kolnayana wali 1273 is 1290, is sokexe ik zanixe ke XVIII^{-eafa} decemda is konaka amudama, is dere konak xatckar atcom (don yon skuyun gan Momik evlon gu 1308 az re viden koe Echmiatsin, is migexa ke XVII-XVIII^{-eafa} decemda. Xo vas yon naboxaf raporey dem kosuteks ko kolna iku dive dere ruldar.

Surp Karapet uja is intafe *gavit gijaxe*

Dalaf uja ke tucpastaxo tir Surp Karapet. Taneaf vegeduks tir evlon gu IX-X^{-eafa} decemda gee refa uja aze sokon gu rawaks lapter. Tiyr tantamaxo dem kovagalza tupoayana gu balemoya jontolafa vokoda is do toloya krilafa tantamaxofa amuda.

Refa uja dere yoltkirafa gu Surp Stepanos gan Liparit Orbelian sersik is Sarkis tujradik bak 1216-1223 zo kolnayar. Tir gamdakoraf dem tanoya nikoykirafa vimava is balemoya tolvegemafo gentimamud. Sedme lan savsaf ksudaks, tiyr dem anyustkrilafa truga valeve yaskokoraf sfelt. Bata toloya rulda bak 1840 zo vilayad aze gu akintakoraf truga is feykoraf sfelt zo ikaplekuyud. Zikexa tir soyutafa : koeon anton yona ellasafa gamda is tagra ingasa va teyel ke brivacku ; diveon toloya ponyaska is koxutaxa ke toloy ronef dilk anton tid.

Rontimgentimafe *gavit gijaxe* moi Surp Karapet uja ape zo kolnayar ise tiyr dem balemoy swalot voxe bak 1261 serson gu Smbat Orbelian di zo artazukapayar : brivacku gegisu va rebava slamed, azavzayanu tice ontineacku vwon ice anamba dem kosuteks ke sersik lize kepaita ke kolna giskisa va stonagalza vamoeon dayker. Pona ke batmila galza tir dem balemoyi bopi is istefa lujoraf olkoba dem pru is tanoya krintala. Titak ke lentefi bopi ke kepaita gu savsafe *gavit gijaxe* rotir zo dimnariyr, ise va okollakisik dem abalt tcabanes va krapol kaatoer. *Gavit gijaxe* va yona naboxa ke Orbelian sersayasikeem (don tela ke Stepanos izvopik is tujradik) is konak tucpastik bravar, is konak xatckar atcom. Batmile xe gu zikexa ke taltef lentor soe zo grupecker, i gu zikexa « katcalafa gu yambafa duga is ewavafa tanuskuca » nitesa vas toloy moaykanaf cisek skuyun kaiki 1261 is rokleson gaayan gu Momik.

Titef cisek mialivamuf vamoe dilk ke *gavit gijaxe* tigr ise va Ketya dem Nazbeye dem anameon jontolaf emacek dem tagra volar. Tanoya perfava isu krapol isu zveri vamoe Ketya tigid ; roneon Yeshayahu katcilik tir isen talteon lan koredik rotis Mika katcilik ok Yohanan ok dace Yezekiel katcilik. Batmil cisek tir zikenaf gu imwafum ise to tulanya ke trekafa balumara ;

Ticef cisek dem otsaf ontinuk vamoe toloy jelaf dilk tigr. Va isteon Lorik ton tazuk ke « Savsik ke vieleem », is yalestaf lesay is dem soyorekoraf iteem kaatoer, i va lorik redus va Adam kare intafa ewava, i va Adam moion blizesin gan perfava. Ponaks va lan « jebes alkopaf trak » tcazedar ise va



NORAVANK, ARMENAFE TUCPASTAXE

ise va redura va Adam blizesin gan lorafa sukera divrozar ise kimbar da ayikeem eglusiyin gan troba ke taneaf ayik, tuke wetara ke Kristos bene gamda zo giwatar, batkane tcazedason va tirkacka ke armenafa ujeva icde Trinitas kristevaf rietovolk.



Cisek ke Surp Karapet uja.

Surp Grigor uja

Surp Grigor uja (okon gu Smbat Orbelian amuda) lente Surp Karapet bak 1275 gan Siranes vegeduropik zo kolnayar, jafayanon gan Tarssayitj Orbelian. Tir tantamaxofa uja dem kovakorafa galza, dem varoneon mialivamuf muxelk vawale xatckar atcom is balumayana perfava. Koe uja, xim ke lenopa wan zo rosolwid. Surp Grigor uja vas konaka naboxa ke Orbelian yasik don Tarssayit nazbeikye ke Smbat is Elikum berikye ke Stepanos awalkeyese bak 1300 dogiskir. Inaf naboxaf atcom va krapol kaatoer : lan kosuteks pebur da mil sersik « dum krapol ieyer » kotviele lyumayar. Talteon kolanixo ke uja tir dem ticef cisek.



Surp Grigor uja.

Kotavaf Izvugalayak [-800 – -700 : Afrika]

Sinka is Anameda — Irubara is Vegedura — Ckane is Gandura — Yamba is Miga

DONA TA JIDOL

Tcabaneyestasik ke abdaala ke istefa Afrika va bet sulemam gilestuyud, i va pilkovon medjitol (*Cercopithecus neglectus* latinavon). Ban jidol ton milkap zo gralomayed ise zo kugdayad ise zo dackeyed nume ko ikse ton dona lubeyed.



Medjitol

DOPEWA KE NUBIA

Bak -8-eafa decemda, atayera va Amon-Ra misraf awaltaf lorik gan nafalik ke gazaxo ke Nubia vankedayaso moni -750 zo kanariyir. Gu zolonafa dopewa tite Jebel Barkal mefta mbi ziliyar isen konakara dopewa dere zo vegeduyud, tulon bak gazara ke Piankhy gazik (-751-716). Sinafa grustara dem orna is kusk is bontapa va tela ke misrafa dopewa kawarzeyer.

Dopewa ke krapol ke Apedemak, Naga, Sudana



Surp Astvatsatsin uja

Surp Astvatsatsin uja gerone Surp Karapet wali 1331 is 1339 kare zovdom ke Momik awalkeyes bak 1333 zo kolnayar. Gu Burtelashen (« kolnayana gan Burtel ») nope yolt ke Burtel Orbelian jafasik dere zo yoltayar. Kolna tir slapeuja ke bantan is inafa yasa ise tir barwafa : taneafa vwa divuon rovansana titlanison moo tevoy avlak, is tisa dem rontagentimaf zovdom, tir slape, isen toleafa vwa divuon rovansana kan fogelom geginaf gu taltef lentor, is tisa gamdakoraf zovdom, tir miv uja ; tadle ke bareafa vwa tir dem sfelt giskin gu revark dem san-toloya briva. Wetce tanafa tula, baroya bata briva zo balumayad : Ketya dem Nazbeye do jafasik atoes va uja do inafe nazbeikye tigr. Bata bareafa vwa bak 1840 gan ruftacek zo vilayar aze kan xantaf stogoyeks bak 1997 zo dimvegeduyur.

Inafa balumayana zikexa tir kulapafa, koeon nope leca va evangilik ke taneafa vwa is Kristos vawale pumkik ke galzamu vamoe muxelk ke toleafa vwa, lidam diveon nope ponaks ke tuveleem ke taltef lentor. Bat tuvel tid vawale yona rontagentimafa kadoma isu briva isu darkasaberopafa vola isu perfava is tanoya kabayikya ise tid dem cisek tulaf gu volseyta keve vlardaf ludev.

Titef cisek va Ketya dem Nazbeye vawale Gabriel is Mikael toloy tumtapumkik kaatoer.

Ewavon is martigon, zavzar pokef gu Byzantion prostewa ; ticef cisek va Kristos vawale Petrus grekik isu Paulus kaatoer.



Lentor ke Surp Astvatsatsin uja



*Nuyafa ewava male internetxo :
<https://commons.wikimedia.org>*

Internetxo : Kotava : langue, littérature / ava, suteroteem

<https://kotava1837481.wordpress.com/2018/11/19/izvugalayak-800-700-afrika/>

AZILAF A IMIZXA

Azilafa xeka isu imizxa dun tiyid riaca koe Misra kali lewe -800.

Koe Lentefa Afrika, mano ervo gan foinikaf dolekik mal suriafo is lubnanafa krimtaxo loleon milugale zo plekuyud, voxen arti konaka decemda oxam di zo faveckeyed..



Azilafa kabotsa, Misra



Lingeyen nomulk
ke inseik, Misra

NOMULK KE INSEIK

Bak -800, moe nomulk ke misraf inseik, delt va awalkik, gan lingeks kaatoes va dalint firvis pu lorik, loloon zo ikaple-kuyur. Levak ke boruk banvielu loviele gitiyir dem divokseks male *Neva ke Awalkik*, i male larma dem diolaf tazukoy ta nendara va awalkik remi blira kaiki awalkera.

Nomulk kum konak vwepaf azeb sinton gluyedayan kan tarida zo epuyur, i azeb radimion besayan gu giroda az ling.



— Tokdume abdion me al kalil ? ~ Makar yoromon dulzavar.

— Kiren re mana boyara tir gaversa. Kon gertik co gokowalzeyer ugale bliyil.

Makar mibuer. Rabater da kot gertik sometir favlaf : ae va ujazil sokazawar voxe me lasutaver lanviele tatarik gu olaxatoa zo gonyarder enide Makar va falera va troba di malseotar... Drikaca : decemoya troba !... isen kota batcoba ika tanoya toa !... En, vode !...

— Kel !! ~ kalir. ~ Tanoya olaxatoa titir uma. Va balemoya ara dadí, pu tatarik fu zilí... Kotak : balem-decemoya troba...

— Rwodel !! ~ gertik kalir.

Makar rwoder. Kadimeon, dum batakafa ploda, letafa azeka divlizer. Ileon, tatarik dum ebeltafu u bak vula awir. Remi ware vula, Makar va noldagopa tixulesa levu kriza ke intaf tolukaf okol fowir ; voxen bat rujod dere griawir.

— Ae, ae, ~ Makar kalir. ~ Tatarik va jinafa olaxa fiandeter... Ax, va jinaf okol al emoyapal, man facilik !

— Me, ~ gertikam kalir. ~ Va rinaf okol me al emoyar. Voxen bat okol tir to dubieyen. Kas va guazik me al ikagildel, i va guazik kalis da « kan dubieyen okol, kontan mekase ilon rolakir »?

Tire Makar va guazik tolkalis va bato karedjo ixam al ikagilder, voxe larde remi blira va tatarik kallakis va widava moe dubieyen okol wori jontikviele al wir, volto destara tir da va pulvira ke guazik dikeke tuzolonar. Re, wori, buivewé da dace guazik va ageltuca rovokalir...

Azen in sonker da moe azeka va jontik okollakisik kaiklanir. Sin kot ton mile kalie dam taneaf lakid, okol dum zveri talad, ayik gan gopa zo besad neken Makar kaiklanir. Kotboron va tan kadimon isker.

Istef tuvel zo fenkur azen Toyon guazaf guazapaf kolanir. Inaf dilgavukaf lukastap tir valev anamba. In va myotxa is kulupaf lay diskir. Makar va mancoba meveli al nyaser. Va stazeem inganaf gu piako dere diskir, i va stazeem oltavaf gu tel ke nugeem ke guazaf brijalingesik lekeon katcalayan gan Makar.

Vere, ba taneafa disukera, Makar va guazikye lekeon ewavakoron wiyin koe uja ton guazaf Toyon kagrupe. Voxen ine va nazbeikye doon me ruldar. Makar trakur da bantel arlize dekedon ape tigrir. Volson, perfava awir. Koe olkoba vamoe guazikye konakote anametalar aze va inafe bade nugagir. Debanyes moe bumafa deba egayana mu ant int, guazaf Toyon va perfava kan nuba santar.

Altoza ke guazaf Toyon va vonuca somuxar. Kotviele Makar pestaler da takra tupwertawerser, pune va bata gexata disuker nume loeke vir.

Inafa takra batinde adeer kiren in va varafa blira is pinteem vansetiker. Va beta bora isu kuftara isu balieyen aal is beta vursera isu ulira va lavajeb setiker.

Nume tir kinokaf ise zider. Voxe va guazaf Toyon aze tubudawer.

Tubudaweyeson, nuer da va konaka derka soe fu laxupalser.

Guazaf Toyon va in rinder, erur inde in zo yoltar ise lizu artlanir isen tela klaa ke in tir.

Makar dulzer azen guazaf Toyon gin biber :

— Va tokcoba remi blira al askil ?

— Miv grupeckel, ~ Makar dulzer. ~ Va kotcoba tce al bendel.

Makar va guazaf Toyon posar. En djugrupe kase kotcoba zo sobender.

— Miv pulvil !! ~ guazaf Toyon kalir.

Numen Makar tuodiakawer.

Va inafa dafuyuna tokoda ke kobara toz pwader. Beka va otacka ke intafa kuftara is balieyena viza is bourga conyukayana gan intafi ziasiki setiker, pune va konaka decitoya viza is konak decemoy edavacek dem inta is dere konak decemoy trink is tokodapa ke faytawaks soe loplekur.

Moi tena ke dribura, guazaf Toyon va Ivan gertik gukoer.

— Re va vertok vanburel !!

Bam oxam Makar narur da Ivan gertik wetce suruksut(suteptik) tir zanisik ke Toyon. In vanyer kantapan kir volabduwalzeyen gan gertik wetce nik.

Ivan gertik va vertokap vanburer aze toz belir.

— Rabatel !! ~ guazaf Toyon kalir, ~ Tokote viza tid ?

Gertik va vertok waldisuker aze nigeson dulzer :

— In va baroya decita icle al loplekur.

— In rotuxar ! ~ Makar ziadgeson iegar. ~ Roklar. Ape kire tir izakotik ise stron xonukeyer.

— Va int stival !! ~ guazaf Toyon kalir. ~ Kas va drorso ika ujazil pu rin koaykayar, ika ailkera, ika kurera ?

KLOKARA KE MAKAR

— Co kiové ede maninde co buntú, ~ Makar dulzer.

— Kle wickil, ~ Toyon kalir. ~ Voxen dere grupeaké da in djukaruliyr...

Isen guazaf Toyon zider.

— Va vexala dem inaf kobendeyen trobeem kre belil, kiren in tiyir volrodirnun levcoesik, ~ pu Ivan gertik kalir.

Bak bata keyaksera, zanisik mo moavaf azekot va vizeem ke Makar isu pilkoteem isu tayeem isu kotafa kobara al mimad. Moavaf azekot nope mano aldo tuomawer solve intaf azekot volson ticnir aze tere artnir liz meka nuba me rotuzar. Jotaf zanisik ke Lorik gowiltsotced aze vamo Tawava titutalad aze lo decemoy va wazdel ta tuomara va azekot tere impad.

Grabom ke tcalganik tir engamiáf !

Azen Ivan gertik va coereem ke Makar toz patar. Va tol-kun-decit-lerd-decem-bar-san-baroya nyagaca trasir. Azen gertik patar ote Makar va tiraccek dem lavajeb al ulir : va balem-decemoy trasir. Aze gertik wan kopatar. Makar rabater da bat intaf azekot va ban moavaf wetce gamiuca re felir ; ixam ko fe titnir. Darpeda gertik belir, pune azekot loon tuomawer.

Makar bam trakur da arienta kevon tenulejer. Va sespa vanlanir aze kan nuga va titnira va azekot menuvaskison lasuriojar. Tan zanisik va fatmara sonker numen iyepta di tir.

— Tokcoba dilizer ? ~ guazaf Toyon erur.

— In va azekot kan nuga al lagazavzar, ~ zanisik dulzer.

Bam Toyon zides van Makar rwoder aze kalir :

— En rabaté da til levcoesik is izakotik... Va koayka me al verkal, va ujazil pu gertik wan danul, isen golde rin, golde rinon dure nekina yoromaca, ramisavik kotvielon trobar !...

Azen gukoeson va gertik, guazaf Toyon erur :

— Toktan koe Tcalgan tir tel loon turunkas va okol, i tel loon vajas, i tel loon tugutegisas ?

Ivan gertik dulzer :

— To pofesik ke uja tir. Va ledungxe gedir ise va ramisavik gistar.

Bam guazaf Toyon azavzarer :

— Bat vungik pu pofesik zo zurter !! Wetce ikrezuuyun okol va ramisavik star vieli di cuawalker !!... Azen boyuketé.

Guazaf Toyon pulvir viele tuvel zo fenkur. Nazbeikye ke guazaf Toyon va renga kolanir. Ron gadik debanyar.

Azen miltan kalir :

— Va azavzare su gildé... Vanmiae ayikeem jontikedje al blí nume va tamavolkeem is cobeem sogrupé : bat kimtik titir xakepes, ta impadimara va ramisavik flecuputur... Voxen... titir !! Wori, va koncoba rotir djuloplekur. Pulvil, baraxsan (kimtik) !!

Bam cugunaykaca dilizer. Makar, mil Makar somekalis va loa sanoya azafa ewa, ve pestaler da yoy va int solgluyar. In toz pulvir eke miv zo akoydar. Laninde ton toloy Makar zo jontolar : ton bat pulvir edje ban evodanon terektar. Va oblaka vol folir. Pulvira stirafa is lujafa drikon traspur. Ewa bimiled aze kalion stid ise ton vuckun ematcap va int emad. Makar dun wonter ; kotviele klabor, pune ve dimdunur ise ware lopoon ier. Voxen to zolone tir da in pestaler da inafa uiveuca kobuiver.

Guazaf Toyon, taneon mibueyes nope eskarnuca ke Makar, re kalterektar. Nutrakur da Makar sopron me tir bonaf lion dam nutison. Moi konaka ewa, Ivan gertik ve vuder ; va Makar ben bopi ke lioza impar, voxe bantel divpakuder ise wan pulvir aze pulvipir. Fure gertik ten kivar. Kicera va inafa gexata dace koafir viele va kotrafa is varafa ageltuca divstisa va art ke tan adlutik gilder ise sonker da bata laoaca va llamaf Malyesik nupuver. Dace jotaf zanisik ke guazaf Toyon va zana bulud aze kak tuvel lanid. Dem krujapa is rumkawes wilteem va sint ladavad ise va dewitca ke Makar gevanon terektad.

Makar toz dakter da den pofesik vol djuprolanir ise wetce ikrezuuyun okol vol djuprozanir. Volto va kobara craker voxen to azavzare tir memalyafe, numen larde azavzare tir memalyafe, pune vol djuprogruider ; va ine lidam noldara ke lekeugal nyurnar ; batdume va runda me betatar. Zo roderaykar inde Toyon co kuranir, dace pu oretlik kotvieli zo rozilir, voxe va ramisavik vol statar, larde bate azavzare tir volmiltekafe. Neke gan ikrezuunuca ke okol me zo kovudar. Kore pofesik va kot okol givamosir ise va tildera somenover, pune va granja icle gizilir. Solve Makar, remi blira, zo sokiwarzar, metildeson is mecenunon, ise va granja mbi somefirvir.

— Toktel va rin kle batinde iwazayar ?~ guazaf Toyon aundeson erur.

Gue, remi kotrafa blira, Makar zo vamosiyir, dure kobas, dure iwazan, somewalison. Toktan va in kle dun iwazayar ? Voxen to widokilik is utcokilik is palsotik is ramisavik maldines va koayka sotid ; to gertik maldines va ujazil sotid ; to copuca, to ael ; to fent is idul, to idul is rod, to tapsid is aalxojo !... Abduplatin bonol solanir, disukeson va sid vox megrupeson liz !... Kle in milinde sotir... Kas gildayar va coba gertik koe uja gibeliyir ise dume va ujazil goverkayar ? Kas grupeyer dume taneafe nazbeikye wetce sayakik zo koparintayar ise liz di laniyir ise lize di xonukeyer isen lize inaf copaf niskeem re dayker ?!

Klokara ke Makar, ke Vladimir Korolenko (5^{-eafa} zixa ; diza titisa koe diref otuk)

Klokara ke Makar, berpotam (1885) ke Vladimir Korolenko rossiaf suterotik
Xanto : *Сон Макара*, rossiavon, kalkotavayano gan Mixail Kostov, 2008.
Dotay : Kotavaxak dem Suterot.


Robelin banliz : <https://fr.scribd.com/doc/305871177/Klokara-ke-Makar-ke-Vladimir-Korolenko>

**Frederic Edwin Church (1826-1900) ~ Amerikaf lingsik**

Frederic Edwin Church ba 04/05/1826 koe Hartford (Connecticut galdolk) kobli aze ba 07/04/1900 koe Greenport (New York galdolk) mulufter. Tir amerikaf patectoyaf lingsik, i tan nelkaf kaatoesik va Hudson Bost serna.

Blirizva

Erbakiruca ke gadikye, i ke rogopik is truliasik dere vanpitis taneagadesik va ravaldasu sistu, nover da Frederic Edwin Church va yamba abditcon ektudar. Mali san-anyustdafa klaa, moi kakevera jupayana gan Daniel Wadsworth, i gan vegungik is nik ke Church yasa, jotaf Frederic vanpir koe Catskill tanaf tavembik ke Thomas Cole redusik va Hudson Bost serna. Stekeon, Church wetce ematcokilik ke toleafa oxila ke bat amerikaf yambaf lizor di zo torigir.



Bak 1849 gu Amerikaf Cultim ta Zovdara zo libur ise vanpir tel lojotaf bewik ke bat rijay. Kadimion va taneaf zolonaf grabom pu Wadsworth Atheneum tcila ke Hartford doler.

Bak 1850 va New York koirubar ise va patectoy ke New England gola wan linger. Banugale, mali imwugal kali muvugal tandeon gikoyar, loviele lanison, zovdatason. Ba kot fentugal koe lingexo va



int inker ise va trutcapa male inyon lordeks gilingir. Dro ke inyona trutca adre tugijawer. Bata taneafa rekola ke grabomeem ke Church va martig ke Thomas Cole feliik ware danupur, voxen konaka anulaca ke inafi rali ixam remrud. Voldum Cole gogolase va turietavan is riwe vundopaf buneks ke patectoy, Church va nakila gesiasa va bli is tuca abduarbar, koe zikexa lize va kulafa ukafa luistava kosaver, i va luistava dem yona kerinda ik kadulinda ik kramteukinda, spueson laneke tupizasa va trutca.

Kalion sposaf koe Amerika gu ctakaf patectoy, Church gu aryon lingsik va int soe illtcalar, tuggedrason va intafa koswanuca, jontikviele divrozason va divepatectafo xo. Koe geefa Amerika remi konak aksat tolon koyar. Koe Quito kelu ke Ekuadora jonvieleper. Inafa taneafa koyara bak 1853 dilizer. Ba bata vula ke klepa, Church gan rietova ke Alexander von Humboldt

germanaf tawavopik icde tawava is ug is dark zo turestar. Humboldt va yambik al budayar enide sin va anulafa altoza ke Andes rodega lajukaatoed. Church moo conyuta ke Humboldt koyar. Bak 1857 koe Ekuadora is Kolombia gire worar. Inafa trutca ke bana rekola tid kiewatcapa. Idja ke Andes rodega trutcapa, lumkirafa gu 150 cm- x 300 cm-, bak 1859 pu woltendan saneg zo divnedir. Church va ina koe apton koafina bonta dem marwida is pia inker ise va worara kodroar. Va burkafa bifa redur. Batcoba tir davafa kiewatca. Mila trutca ika 10000 \$ talolk zo doler, i ika lodontinafo dro banugale mu amerikaf blis lingsik. Church gu « Michelangelo ke patectoy » bam ikayoltar. [...]



Recela 8 : Ōiso

Recela 8 : Ōiso tir lardeafa gweta ke sposaf gwetak vergumveltkiraf gu 53 recela ke Tōkaidō vawa (Tōkaidō Gojūsan-tsugi no uchi), zovdayan gan Utagawa Hiroshige niponaf yambik, is taneon piskuyun bak 1833-1834 gan Hōeidō.

Tōkaidō vawa tiyir vawapa wale Edo (re Tokyo) tiso kelu ke Shogun patectokilik is Kyoto gindafu kelu ke Nipona. Sareon gu Hiroshige, kotafa soluma tiyir vas mon 500 km- numen lanis koyasik bad mon toloya safta exuleyed.

Hiroshige va varaf gwetak dem 53 recela ke zalor zovdayar. Bata gweta (Ukiyo-e tazuk) tir lumkirafa gu 37 × 25 cm- (ton Oban breviz). Tir anyusteafa ke enk ise va greelt koe Ōiso kaatoer.

Greelt ke Ōiso

Recela ke Ōiso (Ōiso-juku) koe Naka utca ke Kanagawa winka tigr.

Bak 1601 gan Tokugawa Iyasu zo exoneyer. Bak 1604, emacek dem pailtega kene 3.9 km- zo taplekuyur enide va izga pu koyasik di tiskayar.

Gweta ke Hiroshige va koyasik dem gilavafa seila kum bapla nedir, i va koyasik mal welfa az kolanis va wida leve aliesa muvara. Tan moe okol lakir voxen arak lanir, moo vawa dem kenefa pailtega. Ara piskura (tela ke Kyōka sanegayana arti abica tanda) va trigafa wida felisa va divatcepe ke Sagami ceda is kozwisa va sumefa meftava ke Izu dega luxeon nedir.



Xantofa piskura : 1833-1834 gan Hōeidō



Piskura : Gyosho enk, 1841-1844 gan Ezaki



Piskura : Reisho enk, 1847-1852 gan Marusei



Utagawa Hiroshige lingsik
(1797-1858)

Varaf teliz tigis koe Kotava Xadola dene Wikipedia.

~ Banliz [https://avk.wikipedia.org/wiki/Recela_8:_Ōiso_\(gweta\)](https://avk.wikipedia.org/wiki/Recela_8:_Ōiso_(gweta))



TAMAVA IS TAWAVOPA

Saint Lucia ewala

Ewala ke Antilla tursia

Meruptesa soka, 166 000 ir- moe 620 km²

Tituniyisa va bira, gevasa vanblira ke ewala

Bancoba ape tiyir gowina disukexapa : woesa gijarotiuca ke toloya sidafa pozla, i ke mit dem delafa ugota ezasa moe rustonafa is teyesafa idja ke Tawava winta. Bata toloya pozla walglad vieli bata titon zo platir lize di dzavewer ise di jewer, miledje bana ticon zo levplatir vieli siday vamo lavek ke welfa di vanmadawer. Batinde Saint Lucia vanbliyir : sidafa pozla ke Atlantika lev tela ke Kariba al kildegawer, ticon platison is turodason va artefo valentexo isu vageexo, i va gola re grupena yolton gu Cap Estate isu Moule-a-Chique.

Saint-Lucia ewala titu welfa weti mon alub-san-celemda molavekaweyer, nume sidopon tir jotackafa. Banugale konakara ewala ke divefa livoda ke Antilla tursiama dere ticniyid : Anguilla is Saint-Martin is Barbuda is Antigua is Guadeloupe is Marie-Galante is Martinique is Saint-Vincent is Grenadines ewalatum.

Konaka celemda is balemoya numafa nesida ke sidopafa vanblira tiyid adrafa kali ref sok ke Saint-Lucia ewala.

Kaiki vanblira ke Pointe-du-Cap vema isu Moule-a-Chique bak Bareugal (50 ik 58 celemda), toleafa nesida ke vanblira bak Istif Bareugal (Miova ik Pliova, 30 ik 40 celemda). Bana rekola tiyir loeke zultafa dam tela taneafa. Pist ke atlantikaf sidmit is aryonu aboveyena ugota platiyina lev karibafa pozla va laumara ke xuva koe idulaf levesid al nekid. Remi yona decitda, bat rustonaf pist spurnon tuidulayan al vanbedewed, kali tunuyara. Porfeon lanviele, gronafa kladasa dolizira va ruftacek nekiyir numen tawavaf mit fenkuweyer. Bal tizaf tculkaf divroidaratum, zuvda dem koteyane tie is guboy is pist is raporka va rid ticniyid ike va bira titniyid, tere reduson va istexo is valentexo is varonexo ke Saint-Lucia ewala.



Wikis va Gimie mefta, an ontinuk ke ewala

Viele vikiz al tekaweyer isen gopa al akoeyewer, pune ewala dem konaka sanoya arna wale groyapa pu tamava va int razdayar. Arti konaka celemda, nope muva is suka is mos, bata meftava vanpiyid ton loon tulwaf is anamkaf tazuk. Pist is raporka tit krimpa al kildeyed, adoneson va bup wale ontinuk, batinde reduson va datca is krant. Muvalava vantraspusa eliwon ico meftava ko kuksa vanbadewer, djaveson va bixe is pist az daykason ton fultey tit meftava. Batinde krantay ton bodafe mantafe divatce poke krimta vanbliyid : Roseau is Cul-de-Sac is Fond-d'Or is Marquis is Troumassée. Giatera va getaltulentronafa walkuksaxofa conya dum

toforestava iste ewava (vug- 274 m- vamoe lavek, La Barre de l'Isle) dere ablesiyir. Dalaf ontinuk ware tigis valente Saint-Lucia isu iste tid La Sorcière veelda 677 m-) isu Flore (564 m-) isu Lacombe (453 m-) isu Saint Esprit (585 m-). Veelda bal ironokaf nesidatum ke tculkafa tegira awiyid, viele keldega ke tculk va ugota ten divmimayar numazen spurna koeon tuolgaweyer. Bata tiedeleyesa spurna tir olgafa dum burgi nume vion loon dam anamefa pistafa datca sotuolgawer.



Voxen Saint-Lucia mea tiyir ton batugale grupen tazuk. Moni 26 celemda (tici Pliova, titi Miova), bareafa vanblisa nesida, gire tisa tculkafa va ewaleem ke Antilla divefa tursia botceyer. Gire tazuk ke Saint-Lucia mulon zo betayar. Divlankeratumap (remi konaka decitda) va meftavaxo gee Roseau kiyir, iste ewala kene Anse La Raye kuksa kale geon Gimie mefta is ronon Gros Piton. Zultafa taltefa krimta is istef meftavaf patectoy tusposas va Saint-Lucia gan bata bareafa sidopafa nesida zo kiyid. Koe mana ewalama (vas 20 x 40 km-), ontime ke meftava tir zolonafe : Gimie mefta (950 m-) isu Canarie (918 m) isu Paix Bouche (745 m-) isu Tabac (678 m-) isu Parasol (613 m-) isu Houelmon (638m-) isu Grand Magasin (645 m-) is toloya losposafa arna divnickisa va Kariba bira : Petit Piton (738 m-) is Gros Piton (786 m-). Nope giates ugal leon abrotcif, bata meftava loeke remgabed, dem stona is xed talgukayenaf loon dam telyon ke istexo ke Saint-Lucia oku valentexo oku ronexo.



Gros Piton veelda isu Petit Piton



Dauphin ceda

Koe vema ke Soufrière, ivamufa tcelda dem xakola vas mon tevoy decitmetre zo kosmayar, i tcelda tcalasa va savsafa atitsuyusa granafa buga (skarn). Opik trakud da viele buga atitsuyur, pune ludev tit loon 250 metre akeoyeyer, kison va koingapa ton jumta koe patectoy re grupena yolton gu Qualibou skarn. Moe ludev ke bata buga, enk dem bar-san-baroya tizapafa tculkafa divroidaxa kaikion sokiyr, malkabuson va yon baponaf kootcek dem tie is guboy is divmimason va pist is raporka kan popo eke lana ugota va san-baroye decitmetre mal buga kalniyid.



Fond d'Or ceda

Nope lazavanya va « tculkafa aora » pulvit. Batugale tevoy sfelt is peroya tculkafa buga tite Qualibou skarn lapted, koe Belfond vema. Milugale sfelt ke Gros Piton veelda isu Petit Piton isu

Plaisance isu Rabot dere vanbliyd. Tere giatara va fultey aname batyona meftava grifuneyer aze solstayar, anton iskeson va veelda ik verolekkoraf ogluk.

Roma ik Soufrière bad tanoy vielcek me vanbliyd : bata tculkafa divroidara remi yona decitda jijayad isen wali yona divlankera, rekolapa dem soistaf muvacek is kentacek tiyd. Bat kentacek va meftava silukon titniyd, nekison va diblatraspu (gend). Bata diblatraspura dile en tiyd granapafa : poke Soufrière, lana traspura va fulteyafa bada vafa vas loon balem-sanoye metre kadimeon iskeyer. Lanara diblatraspura loeke zolnapafa nekiyina gan lan gulaf divlankecek bak Xolova (Balemeugal) va kotafa vema wale Soufrière is Vieux-Fort besayar. Batcoba tiyir balemeafa is ironokafa sidopafa rekola kiyisava tigira ke ewala. Va iara va diekekirafe fage trakut, i va iara kan mogimara va jena bota mo burmesa pozla dem wikande, nume rietat inde bata ruelgakorafa traspurapa va vosta kopleyer ise va venta molavayar ise va meftava ranameyer. Solve vagexo ke Saint-Lucia lekeon tiyir arestafo lion dam lentexo, inafe tadle batugale tir ton axafa koliava is denoxa. Aname Vieux-Fort, batcoba va azekackafa vema vas 10 km² dere zo nekiyir lize Hewanorra walvedeyafo severoxo re tigrir. Va dulapafa pinta dere stragat : koe Vieux-Fort ana savsafa sidopafa vanblisa nesida poke tela lonoeltafa tigrir : Moule-a-Chique evilma kiyina gan pozlafa levmadara vamoe diblafa azeka ke Vieux-Fort ton rojuxa tigrir.



Wikis va Castries kelu is molt, kene Carenage ceda valenttalte ewala



Dennery ceda, kene ronefa krimta.

Darpe ugal, levesid ke Saint-Lucia tudiliodawer maneke antafa sugda ke runkafa tculkuca rekeon tid tanoya gantakeldega is tanoya nulafa defra gee Soufrière wida. Banlize durefa divstisa ganta isu tie remo yargada ke tawavaf almuk va xo titu skarn tuvartad. Ironokafe buze ke Soufrière tculk koe Saint-Lucia tir bak 1780. Tculk ke divefa livoda ke Pinafa Antilla rekeon ware runkaf tid tel ke Montserrat (gire divlankes mali idja ke 1990-e sanda) isu Saint-Vincent (ironokafa divlankera bak 1979) isu Martinique (lize bak 1902 divlankera ke Pélé tculk dem teyese tie va loon bar-kunoy korik aytayar), isu Dominika isu Guadeloupe isu Saint-Kitts. Grocelon ice

lentefa krimta ke Grenada, Kick'em Jenny midaf tculk dere wan gurunkawer. Beka tculk ke Pinafa Antilla levesidon tid gamtanaf, divlankera ke Montserrat va keska ko Saint-Lucia vugote nekiyd, vaxeda va gijarotiuca ke divstira ke ganta is defra ke Soufrière abiceke laumasiyd.



Soufriere ceda vagetalte ewala.

Lidawicka

Saint-Lucia boe bwaxo tigur, kore lidawicka gan lentronufa iklava zo tuzakodar. Larde ewala sume witalu me tigur isen yanka ke anamef lavek vas 25° iku 28° , pune yanka ke krimtaf gael wali fentugal is idulugal abiceke rustar. Rodugal mali santoleaksat kali teveaksat tickir azen abdugal mali teveaksat kali santaneaksat. Mialukafa afizyanka tir vas mon 30° isen mialukafa mielyanka vas mon 24° . Mialukafa tandeafo muvareka tir vas 1300 mm- mo krimta ik 3810 mm- mo muvafu aalxo koe meftava.


Dunoleem is ruxeem

Nope bwafa lidawicka, Saint-Lucia va soporaf ruxeem dir, pilkovon koe abdaala. Va ruxeem ordaf gu Kariba trasit : dazuma is vopteya is noduga is semutca is bilka is starpa is tatlaka is pia voxis jisova cuisson imwesa bak abdugal. Jontika apta rekeon mafelayana zo kobureyed, dum mikroba is xenca (male Barata) is fleca (male Istefa Amerika) is galketa (male Tahiti). Vedeyaf aal tir finyega : enga ta iara va azekol is ekeda prostewon zo faver.

Dunoleem ke ewala dere tir kulapafa, dem dotayany dem zverifa katca : lana tid xantafa gu Saint-Lucia dum vartaf zertek ke Saint-Lucia (*Amazona versicolor*). Bati kafi zveri disi va kusablafof bruxeem tiyir kosafi gu mordara numen sanelia zo tsalayar nume arti 1970-e sanda riwe griawiyir, bandume bowere va nendara gorayar ise gu lecafi zveri vaon tuvedeyayar.

Ke perakeem, va tigira ke imboza (atoasa moe piluda ke Grande Anse) is zoxa is pembey is perake (tulong wupesis *Bothrops atrox*) gomiwat. Kene vawa va korik bures va tsay fereon rowit : afigasutera ika erbama rotir. Koe ewala vesnol is guritcol dere blid.

Biraf dunoleem dere tir kulapaf, dem loa tol-sanoya katca vas megol ok yaburo. Albasik va midafa estobara gan siuda dem jonksefaf kabay blis koe drakxo zo skebur.



Drakxo aname Saint-Lucia



Perake (*Bothrops atrox*)



Zertek (*Amazona versicolor*)



Muvaala ke Saint-Lucia

TELIZ

2^e bu : Noravank, tucpastaxe
4^e bu : Kotavaf Izvugalayak
6^e bu : Klokara ke Makar, berpotam
10^e bu : Frederic Edwin Church, lingesik
11^e bu : Recela 8 : Ōiso
12^e bu : Saint Lucia ewala
16^e bu : Liwombura
16^e bu : Kuda ke Aisopos

Kotavusa virda

Virda kotavon sanelayana, nuyon is faston
romalvajana is rorubiana is rotamzilina.
Ickriluyun rokeem. PAG / DE.
Internetxo : www.europalingua.eu/KotavusaVirda
Bu : www.europalingua.eu/KotavusaVirda/10-e_otuk_08-2023

Sanegara : Anyusteaksat ke 2023. 10^e otuk.

Yunkeks is ewava : ewaveem abugaf gu roka ok
nuyon rotamuzen ok rictayan gan digisik.

LIWOMBURA

Tula va liwa ke lana ombaliwa watson gu alto.
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/08/26/7-familles-en-kotava/>

1

Loma
KRAPOLDUNOL

FR
lion

Krapol



Atelatoraf moukdunol, sotis granaf dem
mantaf lesay is brixakoraf yinaxot, is dem
alnaf ulim is jemakaf im, goviton soblis
moekote koe Afrika. Dile dayoltan gu an
sulem.

krapol - jaktol - kraimol - cuskol - uksabol - karvol

Kenibes vakol is idatcol

Vakol kabdue diel keniber. Idatcol iper nume fu estur, viele vakol ve bliker da me vere zo
vikear : « Re, ~ kalir, ~ tí tiguaf is wiputaf ; voxen kemel !! Jinaf felik fu vidiafiptar ; dere jin
estuputú, tusudaweté nume tití loplinafa estura ke rin. » Idatcol va in folir nume mallanir.
Vanion dimlanir aze va vakol kenibes koe ontinafa olkoba ke mona trasir ; ticon vukir aze
rozar, tolkalison va sintafa agvava. Bam vakol : « Ey idatcol, ~ kalir, ~ ede batvielu va jin
kenibes kabdue diel co wil, pune va vidia mea kel !! »

Bata kuda nedar da pestorik, kotviele va int gu lane wupe al divplekur, pune remi blira guon
sokonendar.

Kuda ke Aisopos, -VI^{eafa} decemda (kalkotavaks gan Yurani Andergan)

